

熊士選集序

明進士中順大夫江西按察司副使奉 勅提學北郡李夢陽著

熊士選者豐城曲江人也名卓字士選中弘治丙辰
進士除平湖知縣後擢監察御史會劉瑾亂黜之歸
劉瑾之亂矯

詔黜歸者四十有八人而士選及余與焉再踰年瑾
誅起余官江西過豐城訪其人於曲江之濱亡矣乃
於是哭於其墓輒復收輯其遺詩可讀者得六十篇

然皆精細言華錄之俾藏於家李子曰夫余於士選之亡而疑於禍福之機也蓋苦失要實不甚解又無所測夫往來昭昭者云曩余在曹署竊幸侍

敬皇帝是時國家承平百二十餘年矣治體寬裕生養繁殖斧斤窮於深谷馬牛徧於阡陌卽閭閻而賤綺羅梁肉糜爛之可謂極治然是時海內無盜賊干戈之警百官委蛇於公朝入則振珮出則鳴珂進退理亂弗嬰于心蓋暇則酒食會聚討訂文史朋講羣

咏深鉤賸剖乃咸得大肆力於弘學於乎亦極矣是時士選爲御史擇四方士而日與之游聲光赫赫頗有千仞覽輝之望夫治極亂繼名高毀入故丁卯以前識者業已有憂之焉

今上旣誅亂賊反之正民志烝烝不奸又號一治厥亦往來之道乃今盜賊顧日益弗靖學士大夫相與釋俎豆而議干戈夫以士選生存之望誠使天假之以年於是時膺寄受托必嶽立虎躍表見流輩乃顧

死也悲哉古人有言曰勝觀數定觀理蓋言禍福之
必反也士選前罹黨禍慘矣今顧又死獨不值其定
何耶夫測往來者未有不據要實者也要實明然後
幾驗幾驗然後治亂理而禍福彰今既不值其定則
余又安所據而測夫往來也故曰余於士選之亡而
疑於禍福之幾也然盜賊平且有日乃其人則竟已
矣夫余安得而不悲故旣收輯其遺詩而又重之以
辭正德七年壬申五月旣望

熊士選集

四明范欽校刊

五言古詩三首

送許給事中啓衷使交趾二首

春明發車騎合沓集川原
美人使絕域相送東郭門
君去豈徒然能令中國尊

二

邈矣南荒地于今過使君
蠻王拜

帝勅草木識人文日月輿圖外
應歆銅柱勲

寄友

黃雀立樹杪蒼蒲眠水腰天風歛然至雀去蒲亦搖
蒲搖會有定雀去憑誰招

七言古詩二首

詠鳥

鴻鵠遶山阿天寒歲暮增繳多何如遠去蓬池上煙
雨翩翩柰若何

二月望夕同獻吉諸公宴杭氏得月字

夕觴聊引華堂深對此溶溶花上月千門如拭更漏
遲窈窕誰家笛聲發豈無白雲披素絃挹彼清風濯
玄髮人生盛處不可孤蓬水琪園坐超忽

五言律詩六首

贈同科呂祖邦還南都和何仲默韻

地渺雲飛亂江深鴈到遲愁心值月夕別淚感花時
楚蕙憐君意隋珠遺我詩都門一尊酒雨雪問征期

歲晏和仲默韻

天涯寥落客歲晚獨含思白日當空速歸雲帶雪遲
風煙憐去住節物愴心期對酒那能樂攄懷一賦詩

送獻吉歸里

相送轉惆悵天寒聞暮鐘高鳥去不息浮雲安可窮
河關經舊壘墟里對孤松結束平原騎翩翩弋暮鳴

同造廷實倫公方丈

兩月不到寺重來風物親不塵雲石古長夏水泉新
客席侵魚鳥僧房著縉紳題詩欲歸去落日滿清津

遊楊家園池

好靜本吾性開軒臨野塘端居絕塵鞅卽此是羲皇
倦鳥飛欲下閑花開稍香偶來忘出處相對詠滄浪

八月念夜待月感邊檄

輕風吹薄暮飛鏡碧雲端照見庭下客亭袍清且安
江湖鴻鴈杳關塞羽書寒皓露凄然下難禁此夜看

七言律詩二十首

見白髮有感

四十年餘添白髮却因頭白憶青春初緣愁病斑斑
出自落風塵種種新已訝入梳紛滿面每於臨鏡一
傷神官途役役羞看汝勲業猶慚報主身

秋日江行偶成

已經海上形容老復歎天涯音信稀亂葉沉潭龍臥
穩高雲黃菊鴈來歸啾啾鳥雀寒原迥漠漠風煙海
戍微不是江門爲幽興望鄉懷國思俱飛

觀江漲詠懷

拍江忽傳春水漲柴扉卽傍浪花開帆衝急雨籬前
落鷗逐奔濤樹裏來已被風光時引眼况多愁病獨
登臺欲濟何處有舟楫遲日蘋風生野哀

丁卯正月

積雪飛鴉庭宇靜春回京陌漸多姿黃鸝紫燕行相
逐暖日暄風亦不遲極浦移舟沙鴈起平林拂騎岸
花垂可憐浮世黃金貴肯爲虛名白髮悲

立春

歲前三日春歸早庭樹東風款款吹野物尚稀花照
眼江門應有鱸如絲高堂雲物供時賞又客山川動
遠思短世行藏方自愛任教斑鬢轉差差

秋日江頭雜興時弘治己未年寓平湖作

江門秋色太無賴拂渚穿城白鴈歸落葉漸打石頭
滿游雨忽添雲脚肥岸帆送客各自度水鳥避人還
獨飛惆悵椿萱那對眼海鄉江國思依依

秋晨過雨趨朝馬上偶成

矮屋雨聲喧昨夜遠林秋色淨今朝打團風葉湧臯
路不盡湍流漫石橋鷄犬亂鳴白日出珮環齊赴紫
宸朝流年物色人未愛隔水花光他自饒

臘月過平湖大雪

臘盡江南寒較重雪花簌簌可憐生垂天擁地朝昏
錯寂鳥凝雲歲序爭遲暮酒杯何意味荒涼茅屋豈
心情眼看世界迢遙接與在春風浩蕩行

懷獻吉在告和儲公韻

悵念長鄉多病日，熬床藥裹度新春。今來燕子重看
主，舊日宮花虛對賓。百歲相知稀見面，一官踈散實
藏珍。春明不少江湖興，碧杜芳蘭憶遠人。

新秋

藥裹書籤度歲年，幽棲茅屋俯江天。蟪蛄耳亂煙樹
暗，芙蓉眼明秋水鮮。延客須開蔣詡徑，尋幽還上賀
公船。極知世事非吾分，日對青山興杳然。

聞諸友家有菊分求

我愛西峯草堂靜，秋深佳菊繞寒泉。山尊實稱高雲
景，野服何妨細雨天。擬簪花神傳逸韻，豈於露本惜
流年。品題自合歸陶手，不放風霜落耳邊。

與友人分菊

野物雲寒芳菊稠，荒榛僻地減風流。肯乘煙雨分秋
色，亦與雲林開幕愁。已覺寒泉虛映竹，卽謀斗酒欲
移舟。岩阿悵望高風遠，歲晚江湖不可求。

重陽有感

寰宇流光真逝水天涯心事倍逢辰
比來白髮搔更短忙裏黃花開漸新
地冷村城繁鼓角天清沙漠盡埃塵
南歸赤鷲亦愁思蘋藻悠悠秋復春

內翰劉德夫見過贈之

歸休頗愛村居僻路隱重洲曲水連
日暮烏啼榛樹裏溪喧客到竹籬邊
松燈自剪園中韭子漏遲回月下船
自古萍蹤誰有定祇餘搔首竚江天

挽野翁

白首長依松桂伴紅塵不上芰荷衣
追尋北郭花常慣問訊東鄰竹不稀
謝眺雲山元近宅海翁鷗鳥舊忘機
小山擬欲歌招隱猿鶴今來怨夕暉

有客

有客蹉跎毛髮改林居風物念離群
耳聽楚鷺疑燕鷺身在南雲望朔雲
野草絲絲更春色山槐鬱鬱空斜暉
松齋晝坐心如醉伐木歎乃時相聞

新齋對菊

野客臨江一草堂
碧雲遲菊倍年光
當墻冷艷暉暉
蕙蘼雪踈枝冉冉香
豈有遊蜂喧暮景
故酒寬地著
孤芳繁愁逝水催
華髮日日携壺醉不妨

春眺

芳草朝朝春眺改
浮雲難傍野人門
不因病肺寧高枕
翻爲閒居懶出村
楊柳風長次岸動
桃花水新流
港渾塞鴻江燕各飛急
半餉山樓野莫論

用前韻懷友

養白鳥甘分席濁酒春風只掩門
谷口豈無停驥宅南陽實有臥龍村
高天野寺煙花豁細雨河橋草樹渾
多病獨愁稀會面古來交道與誰論

寓大寺留題

今朝方外暫乘興廿載江湖只夢思
老去煙花休浪咲向來猿鶴果相疑
松根草坐春從暖竹裏溪行晝每遲
世慮又知非我意人間何物更多岐

五言四句三十首

送客城南

楊柳河橋館春風倒玉壺離情不可道江路滿蘼蕪
春日登臺望鄉

鄉園何地是落日杳清津郭隗臺前草年年向旅人
送顧華王之官南部

君買南行棹秋潮江上生早天霖雨暘正是別離情
城南最勝寺看新河口占呈忝上人

荷葉始出水荷花何日開最勝今朝興非因花葉來

秋夕旅懷二首

楚鄉眇難卽坐見星躔粲關河落葉餘隊隊南飛鴈

二

南鴈聯翩下關門木葉飛十年家尚遠此夕欲沾衣

寫陶山人屋壁二首

山泉入戶流閑花開自謝此意堪誰語明日來庭下

二

杳杳竹林下青蘿向人長俗客不到門清風自來往

懷友人

昔別柳條綠如今霜葉翻
思君獨莫語寒日下荒原
夢玉仲信醒後感述仲信遷官海南

美人入我夢綵綵見平昔
覺來雲山青君是天南客
送客南還有感

遙望城南道青青草色新
春風生錦棹時送楚江人
送人赴道州任

月照河臺酒離情那可消
衡陽飛鳥盡君去更迢迢

採蓮曲用秦用中韻

採蓮復採蓮盈盈水中路
鴛鴦觸葉飛卸下團團露
酬和獻吉見訪不遇

空齋閉幽巷日夕飛鳥回
細雨煙花裏憐君騎馬來
夜坐懷人遠行

路長人去後燈下鴈來時
繞坐山笳發孤懷堪與誰
登閣見城北山晚興

臺臨古城北落日見春山
飛鳥相將盡孤雲意自閒

憶京中諸友

孤鷹自北來，哀哀求其侶。聲入暮天雲，影落寒江水。
對酒悼友人，用古蚕婦韻。

舉杯胡不飲，感之淚盈巾。昨日庭前客，今爲泉下人。
春日謁陵途中

耳畔聞啼鳥，悠悠客路情。山城春共遠，花發不知名。
夕景

牛羊下荒徑，雲暝古城西。月出沙中樹，驚鳥啞啞啼。

居庸館中

隘地關門擁，山樓鼓角傳。長風吹不歇，塞草自年年。
出居庸

沙上望行人，日暮愁心絕。江南四時春，邊地五月雪。
黃花鎮夜聞柝

中天月色淨，柝滿戍城樓。連歲防邊急，閨人何處愁。
憶弟

霜落木蕭蕭，天寒暮雲起。不見江頭人，但見江頭水。

懷二弟不到

山城暮笳發白鷹背雲飛榆柳蕭疎甚天涯人未歸
懷鄉

夢裏家山近覺來江水深游雲催去鷹默默向芳林

和獻吉晚出禁闈二首

禁城煙樹繞蓬瀛絕島通御驂馳上苑

天子夢非熊

二

遙望朱門啓宮花映綉盤年年春二月燕子入長安

和閨情二首

窻前合歡樹種是誰家子樹高人未歸別恨看花是

二

郎去不可問蒼苔綉上闌閨中誰得知羅衣怯秋月

七言絕句二首

寫顧山人屋壁

亭前流水春沄沄門外浮塵路不分風日小堂君自

足踈簾矮榻看山雲

春水和杜子韻效其體

何處水來驟爾強漲號徹夜誰能當開門江檻已不見幾箇輕鷗浮席傍

李子曰鐵崖子擬杜子作絕句詩輒自詫曰吾爲此詩將以教後之學杜者也余誦其言悲焉夫鐵崖子豈真至杜者邪試以士選此作較之則瑜瑕見矣


刻熊士選集

夫窮視其所不爲貧視其所不取嘉聰承乏茲邑輒就遺老曰有能監察者往謝事而林居人或以重貨來求脫罪於其故人監察每感然却之曰是奚爲者非所謂不爲不取者邪夫窮觀達貧觀富是則監察之行乎且夫事者實也言者華也知其行則庶幾知詩矣故余鏤其詩而述其行焉

正德七年夏五月豐城縣知縣鴈門吳嘉聰謹記



國家圖書館, NATIONAL CENTRAL LIBRARY, TAIWAN, R.O.C.



附錄

明故文林郎監察御史豐城熊君墓誌銘

賜同進士中憲大夫南京太僕寺少卿前刑科給事中翰林庶吉士月湖楊廉撰

正德初元以來四五年間奸人劉瑾用事黨論驟起
大臣科道同日勒令致仕者若干人而監察御史熊
君士選與焉君謝事歸鄉里日讀所未讀書鍊詩工
文欲造古作者之域不但已也歲遇長至正旦一
萬壽三大節雖疾病未至不能拜起必赴縣庭行禮

此外於公門則未嘗一造焉正德己巳十二月廿八日卒於家君舊嘗患虛弱至是復作遂不愈明年天子總攬權綱朝政清明有發奸人事者立磔於市向之屏棄者漸次收用而君不待矣君諱卓士選其字號東溪姓熊氏世家豐城之曲江高祖仁可曾祖用善祖若璣連世隱居不求仕進父楚材封監察御史母彭氏封孺人君自幼穎悟不凡十歲作近體詩族叔祖雪軒見而奇之且謂村學究爲詩偶聲律非

所習也乃授以經學舉業久而補邑庠生弘治乙卯領江西鄉薦明年丙辰南省中式遂擢進士第年三十三矣戊午出爲平湖知縣政尚豈弟不以幹集嚴猛爲能人樂簡靜之治癸亥擢四川道監察御史立朝務持大體值雷震養鷹坊疏陳時事

上嘉納之奉勅勞軍居庸關置所齋內帑於前取尺籍唱名給之故事皆委之帥上下乾沒至是三軍之士歡逾挾纊皆舉手加額曰今日乃沾

朝廷實惠也陝西巡按御史奏邊將都督神英贓罪已經勘明神英夤緣內外連年在鎮擁兵自如適君署掌陝西道卽條奏其事卒逮神英至京師下御史獄論如法權貴爲之請托竟不聽巡按廣東訴寃者人人皆得至前入境二日收訟牒盈數篋風勢所被豪強股栗下僚貪汚有墮風遁去者惜君埋輪省城未及旬月日卽致仕以去耳君平生守廉在平湖糧長陶信若懷暮夜之金責而遣之自後清名益著邕

直無敢及門者家石時巡按王御史待君甚厚諸求脫罪者貨賄狼籍百計懇君君峻拒之衆謂曰公非居官時何執乃爾君咲曰吾此心果有居官與否異耶君爲御史左都御史張公敷華最器重之事多商畧張公方嚴疾惡不可交以私小人側目故黨人姓名張公輩率皆首列在君烏得而不及哉君事父母洎伯父甚謹飲食非先御不飲食與兄弟子姓絕甘分少待宗族有恩意恒以入仕俸薄在職未久不能

如古人所謂足以仁其三族者為歟焉君卒時年四十有七娶戴氏封孺人生一男子曰桂邑庠生一女子適里中孫翥京衛經歷本之子桂將以其年月日葬君於某鄉某里之原先事具狀致君遺命來請銘予尚忍不銘乃序以為誌而係之銘銘曰罷縣之職惠愛為先臺鍊之任正直為賢君歷兩官孰為不然偶遭一時奸人作慝不幸善類淫刑遠斥奸人伊何虐甚弘石漢有黨錮宋有黨碑虎狼蛇虺何代無之君在黨中其人可知驟雨飄風消更倏忽雲拂長空皎然杲日方將起君猶志以沒苟有所立不生而存何以處君漢宋諸人泚筆銘之異世未聞

祭文三首

維正德五年歲次庚午八月庚申朔赴十日癸巳巡按江西監察御史王士昭按察司僉事張昊李璿陳順廣東按察司僉事張芝臨江府知府吳宗周吉安府知府劉喬謹以牲醴啣哀致誠遣吏祭告于故監

察御史熊公士選之樞公生則穎異蚤游膠庠連登
甲第花封筮仕維惠維平豈惠則平令肅以貞民志
下孚治聲上達薦剡績書交騰競拔

先皇曰吁維茲宰臣體悉志意輯和人民迺進內增
迺職風憲豸冠繡斧霜明日爛立杖齊鳴衆職恟竦
天王聖明不測之淵示以坦路孰路伊坦維還厥士
將謂林下旣壽旣康孰緣一疾弗勅摧傷士昭等昔
焉同科今職茲土痛悼齎聲慄懷莫吐嗚呼公所能

者人也所不能者天也人可勉脩天不可必事
君無憾傳家有子斯亦可以重慰也巳斯亦可以重
慰也巳尚饗

維正德七年歲次壬申二月癸卯越十三日戊子江
西布政司左叅議屠奎謹以清酌庶羞致祭于故文
林郎監察御史熊公士選曰惟予與公厥有舊好識
公京華輒見傾倒辱匪棄遺與論幽討公授平湖子
直懷保政均化行如風偃草暨被召命掄選惟藻舊

氓念公福祿是禱鵠立清班簡白囊皂豸繡煌煌昭
曜枯稿予忝同

朝益敦舊造詩筒酒尊各盡襟抱公按嶺南值歲春
早霜飛驛路狐兔潛掃迺罹鉗羅迷邦懷寶尚祈有
終展市公道謫宦諸公載緝時皞公遽如斯鮮美壽
考予來吊公桐棺杲杲嗚呼哀哉尚饗

維正德七年歲次壬申五月甲辰朔越六日巳酉中
順大夫江西按察司副使李夢陽謹以牲醴庶品之

儀躬祭于前監察御史亡友熊君之墓曰仲夏之交
我舟南邁衝沙改路浩浩江瀨顧瞻劔浦有墳山阿
慨思哲人攬涕滂沱惟斯哲人志超羨心如玉如金
英其德音豸魏於冠立朝之端如鷲戢翰鳥棲弗安
聯裾並珂喟昔京室晨遊繼燭宵吟見日形忘道乎
死生膠膝妖祲中昏塌翅各歸天清地寧重離再輝
我乎南來哲人玉顏蕙零松摧不見顏儀見此夜臺
絕絃爲誰掩袂徘徊百身願贖返魂無舟巨川滔滔

林原盤盤車停馬駐孰知我歎尚饗

弘治中空同子以文賦起關中一時豪賢作而應之標樹風騷振揚金石暢流休運黼黻

帝猷要皆大雅之音足宣清廟之盛者乃江以西則熊御史其一人也空同子固上締炎漢中薄弱晉下凌盛唐其詞文其傳遠矣而熊御史則破犂竇徑妙覽貞玄鵠刻于少陵鶩翔于天寶和平溫厚疏越如朱絃惻怛憤幽嚴凝如素雪其正可以興

而變不過于怨蓋庶幾風人之遐思藝林之超乘者矣余少時習聞人誦熊御史詩稍冠見空同子所刻似與前聽者率不類今其詩止六十篇爾疑御史遭罹奸倖拂鬱流離至于歿身厥所佚放當不少也然岐鳳一毛韓陵片石與日星流耀亦奚貴多乎哉近客袁范君侯東明先生間出抄本相與誦諷而感嘆御史者久之曰是篇刻于豫章比見其磨泯滋甚夫崔顥杜審言詩即數十篇乃

百世傳吾懼御史之志不章也君侯篤古尚友精
明而介亮治稱神明宜有羨于熊之風烈也豈直
以其文而已邪是故重刻熊士選集是歲嘉靖癸
卯仲秋朔吉人陳德文著